

# BOSANSKO FILOLOŠKO DRUŠTVO

## MEĐUNARODNA NAUČNA KONFERENCIJA

### SARAJEVSKI FILOLOŠKI SUSRETI I

– 9. I 10. DECEMBAR 2010. –

*Sarajevski filološki susreti* jesu međunarodna naučna konferencija kojom Bosansko filološko društvo u Sarajevu započinje organizaciju – nadamo se – tradicionalnih dvogodišnjih međunarodnih naučnih skupova iz oblasti filologije, odnosno lingvistike i nauke o književnosti. Neki od temeljnih ciljeva ove naučne manifestacije jesu jačanje istraživačkih kapaciteta bosanskohercegovačke filologije te njeno međunarodno promoviranje i afirmiranje, a posebno u vezi s proučavanjem jezičke i književne baštine naroda BiH, koja je – nažalost – još uvijek nedovoljno istražena, dok je u širim okvirima nerijetko i vrlo slabo poznata.

Ove, 2010. godine cjelokupna bosanskohercegovačka kultura slavi najmanje tri izrazito važna književna jubileja – stogodišnjicu rođenja Meše Selimovića i Skendera Kulenovića te osamdesetpetogodišnjicu rođenja Derviša Sušića. Cijeneći ove bitne datume, vezane za imena trojice nemjerljivo značajnih, kanonskih autora bosanskohercegovačke i bošnjačke književnosti, *Sarajevski filološki susreti I* bit će najvećim svojim dijelom posvećeni temi *Kanonska vrijednost kao živa tradicija (M. Selimović, S. Kulenović i D. Sušić)*. Na ovaj način želimo primjereno obilježiti i spomenuta tri velika jubileja, ali isto tako namjeravamo potaknuti i svestranije proučavanje književnih opusa ove trojice autora, kao i širih književnopovijesnih procesa i pojava u kojima oni učestvuju, utoliko prije što je riječ o onim književnim figurama koje nesumnjivo presudno obilježavaju cjelokupnu noviju povijest bosanskohercegovačke te bošnjačke književnosti i kulture, a naročito u vremenu nakon Drugog svjetskog rata pa nadalje. Namjera nam je, također, da se književni opusi M. Selimovića, S. Kulenovića i D. Sušića osvijetle iz različitih naučnih perspektiva, i to ne samo u oblasti nauke o književnosti i ili lingvistike, već i iz različitih naučnih tradicija, zbog čega ovu konferenciju široko otvaramo i za međunarodno učešće, vjerujući u to da će ovakvo što dodatno doprinijeti promociji i afirmaciji cjeline bosanskohercegovačke kulture i u inostranstvu.

U tom smislu, međunarodna naučna konferencija *Sarajevski filološki susreti I* otvorena je za bavljenje bilo cjelinom, bilo važnim pojedinačnim aspektima književnih opusa M. Selimovića, S. Kulenovića i D. Sušića sagledanih u savremenoj književnonaučnoj i ili lingvističkoj perspektivi, pri čemu su – uz različite problemsko-metodološke pristupe – jednako dobrodošla i komparativna, interliterarna i ili interkulturna istraživanja, kao i istraživanja u povodu širih procesa i pojava što ih u bosanskohercegovačkoj te bošnjačkoj književnosti obilježavaju ova tri autora. Vjerujemo da će posebna pažnja biti posvećena, između ostalog, i pitanjima položaja ova tri autora unutar okvira bosanskohercegovačkog i ili bošnjačkog književnog kanona, njihovoj ulozi u oblikovanju bosanskohercegovačke i ili bošnjačke (žive) tradicije, ali i njihovu položaju unutar južnoslavenske interliterarne i interkulturne zajednice, pa i šire. Nadamo se, također, da će sama konferencija potaknuti i općenitija pitanja, pa tako i ona koja se tiču i širih kulturnih procesa i pojava što se na neki način dotiču i ova tri autora, kao i da će se postaviti i sasvim konkretna a važna praktična pitanja, poput, npr., problema recepcije ili provođenja djela ovih te drugih, njima srodnih autora domaće književnosti na strane jezike i sl. U nastavku – tek približnije orijentacije radi – donosimo radni prijedlog mogućih tematskih težišta:

## I. Književnost i kulturne studije

- Književno djelo M. Selimovića, S. Kulenovića i D. Sušića u književnohistorijskoj perspektivi
  - Tretman pojedinačnih knjiženih radova ili cjeline opusa, odnosno relevantnih pojedinih pitanja, pojava i procesa; književnopovijesni, poetički i žanrovski status; položaj unutar književnopovijesnih pojava i procesa bosanskohercegovačke / bošnjačke književnosti; položaj unutar književnog kanona i književnokanonizacijskih procesa; kanonski status kao status „žive tradicije“; odnos prema tradiciji – (pre)oblikovanje tradicije; precitavanja s obzirom na savremene književnoteorijske interese; kulturnomemorijske pojave – intertekstualna književna mnemonika, reprezentacija prošlosti, medijalna uloga u procesima kulturnog / kolektivnog pamćenja; politike identiteta i imagološka pitanja...
- Književno djelo M. Selimovića, S. Kulenovića i D. Sušića u komparativnoj, interliterarnoj i/ili interkulturnoj perspektivi
  - Kanonska vrijednost i opreka središte / rub; intraliterarne i/ili međusobne poredbe; interliterarne i/ili interkulturne poredbe; međuknjževna tumačenja; položaj unutar južnoslavenske interliterarne zajednice – književnopovijesne, poetičke i žanrovske pojave i procesi i sl.; orientalno-islamsko nasljeđe i položaj unutar evropske / svjetske književne tradicije – književnopovijesne, poetičke i žanrovske pojave i procesi i sl.; liminalnost, hibridnost, sinkretičnost i interkulturnost; pitanja recepcije i interkulturne interpretacije...

## II. Lingvistika i prevodilaštvo

- Književno djelo M. Selimovića, S. Kulenovića i D. Sušića u lingvističkoj i prevodilačkoj perspektivi
  - Lingvostilistička i sociolingvistička pitanja; gramatičko-lingvističke analize; standardologija i normativistika; historija jezika i dijalektologija; teorija i praksa prevođenja...
- Kategorije riječi
  - Morfološka, sintaksička, semantička, pragmatička i dr. pitanja vezana za kategorizaciju riječi...

Međunarodna naučna konferencija *Sarajevski filološki susreti I* održat će se **9. i 10. decembra 2010. godine** na Filozofskom fakultetu u Sarajevu.

Uz bosanski (hrvatski, srpski) jezik, radni jezici konferencije jesu i svi drugi slavenski jezici te engleski jezik.

Prijave za učešće na konferenciji podnose se na jeziku konferencijskog izlaganja isključivo putem **prijavnog obrasca** (u prilogu), koji je na uobičajeni način potrebno poslati na adresu elektronske pošte [sfs\\_info@bfd.ba](mailto:sfs_info@bfd.ba), i to najkasnije do **20. septembra 2010. godine**. Obavještenje o prihvatanju njihova učešća učesnici konferencije dobit će najkasnije do **10. oktobra 2010. godine**, dok će konačni program konferencije biti dostupan najkasnije do **10. novembra 2010. godine**.

Učesnici konferencije u cijelosti su oslobođeni plaćanja troškova kotizacije, dok putne troškove te troškove smještaja i boravka u Sarajevu snose lično, s tim da organizator konferencije preuzima obavezu pružanja svih potrebnih obavještenja i pomoći učesnicima konferencije u vezi sa smještajem i boravkom u Sarajevu. U slučaju naknadnog osiguranja dodatnih finansijskih sredstava potrebnih za organizaciju konferencije, organizator konferencije preuzet će i obavezu finansiranja dijela ili cjeline troškova smještaja i boravka u Sarajevu učesnika konferencije, o čemu će učesnici konferencije biti blagovremeno obaviješteni, a najkasnije do **10. oktobra 2010. godine**.

Konferencijska izlaganja bit će objavljena u zasebnom zborniku konferencijskih radova u izdanju Bosanskog filološkog društva. Konačne verzije konferencijskih izlaganja namijenjene objavlјivanju u zborniku konferencijskih radova trebaju biti dostavljene u elektronskoj formi na adresu elektronske pošte [sfs\\_info@bfd.ba](mailto:sfs_info@bfd.ba) najkasnije do **31. decembra 2010. godine**. Cjelovite upute za oblikovanje konačnih verzija konferencijskih izlaganja namijenih objavlјivanju u zborniku konferencijskih radova učesnici konferencije dobit će najkasnije do **10. oktobra 2010. godine**.

Učesnici konferencije bit će uredno obavještavani i o svim drugim pojedinostima važnim za njihov boravak u Sarajevu i učešće na konferenciji.

Ovaj poziv javnog je karaktera i moguće je proslijediti ga svima onima koji su zainteresirani za učešće na međunarodnoj naučnoj konferenciji *Sarajevski filološki susreti I*.

Za sve dodatne informacije i pojašnjenja potrebno je obratiti se na adresu elektronske pošte [sfs\\_info@bfd.ba](mailto:sfs_info@bfd.ba).

Predsjednik Organizacionog odbora:

Doc. dr. Sanjin Kodrić

Organizacioni odbor:

Doc. dr. Adnan Kadrić

Doc. dr. Sanjin Kodrić

Doc. dr. Munir Mujić

Prof. dr. Ismail Palić

Doc. dr. Vahidin Preljević

Doc. dr. Amela Šehović

Sekretarijat Organizacionog odbora:

Nihada Lubovac

Nehrudin Rebihić

Nudžejma Softić

Sarajevo, 1. august 2010.